



Headlines

- विदेश मंत्री डॉ. एस. जयशंकर होरें कनाडा च इक हिंदू मंदर उप्पर होए दे हमले गी चिंताजनक दस्सेआ ते आखेआ जे कनाडा नै बगैर जानकारी दित्ते दे आरोप लाने दा इक पैटर्न विकसित करी लैते दा ऐ।
- विज्ञान ते प्रौद्योगिकी मंत्री डॉ. जतिंद्र सिंह होरें आखेआ ऐ जे भारत अगले म्हीने दिसंबर च श्री हरिकोटा स्पेस स्टेशन थमां PROBA-3 नास दे यूरोपियन स्पेस एजेंसी दे मिशन गी शुरू करोग।
- मुखमंत्री उमर अब्दुल्ला होरें जम्मू-कश्मीर असेंबली च साबका नेता ते विधायकें गी श्रद्धांजलि भेंट कीती।
- मुखमंत्री उमर अब्दुल्ला होरें आखेआ जे केंद्र सरकार बाजपेयी हुंदे नजरिये गी अपनांदी ते जम्मू-कश्मीर दी स्थिति इयो जनेई नेई हुंदी।



Jaishankar-Canada

विदेश मंत्री डॉ. एस. जयशंकर होरें कनाडा च इक हिंदू मंदर पर होए दे हमले गी बेहतर चिंताजनक दस्सेआ। अज्ज बडुलै कैनबरा च आस्ट्रेलिया दी विदेश मंत्री पेनी वोंग हुंदे कन्नै इक प्रेस कांफ्रेंस च डॉ. एस. जयशंकर होरें इस गल्ला पर चैंता बुज्झी जे कनाडा च आतंकी गुटें गी राजनीतिक शरण दित्ती जा'रदी ऐ। उनें आखेआ जे कनाडा नै बगैर कोई विशेश जानकारी दित्ते दे आरोपें लगाने दा इक पैटर्न विकसित करी लैते दा ऐ। उनें आखेआ जे कनाडा च भारती राजनयिकें उप्पर निगरानी रक्खी जाना अस्वीकार्य ऐ। विदेश मंत्री डॉ. एस. जयशंकर होरें अज्ज कैनबरा च आस्ट्रेलिया दी विदेश मंत्री पेनी वोंग हुंदे कन्नै भारत-आस्ट्रेलिया विदेश मंत्रियें दी 15मीं औपचारिक वार्ता च हिस्सा लैता। दौनें मंत्रियें भारत ते आस्ट्रेलिया दे गोआंडियें हिंद प्रशांत, पच्छिम एशिया, युक्रन ते ग्लोबल स्ट्रैटेजिक सनेरियो उप्पर चर्चा कीती।



Jitendra conclave

विज्ञान ते प्रौद्योगिकी मंत्री डॉ. जितेंद्र सिंह होरें आखेआ ऐ जे भारत अगले म्हीने श्री हरिकोटा स्पेस स्टेशन थमां PROBA-3 नास दे यूरोपियन स्पेस एजेंसी दे मिशन गी शुरू करग। इस मिशन च सोलर रिम दे कोल सूरज दे फेंट कोरोना दा अध्ययन कीता जाग। अज्ज नमीं दिल्ली च भारतीय अंतरिक्ष सम्मेलन 3.0 गी संबोधित करदे होई मंत्री होरें इस गल्ला उप्पर लोड पाई जे देसै दे तकरीबन हर क्षेत्र च अंतरिक्ष तकनीक दा इस्तेमाल कीता जा'रदा ऐ। उनें एहू बी आखेआ जे अंतरिक्ष तकनीक नैवीगेशन सेटेलाइट इमेजिंग, Navigation Sattelite imaging, terrain mapping होरनें गी उपलब्ध करोआइयै स्मार्ट सिटी बनाने गी बी बढावा दिंदी ऐ। मंत्री होरें औने आहले बरें च

ग्लोबल स्पेस इकाँनमी च उंदा योगदान 2 फीसदी थमां 10 फीसदी तगर बदाने दे भारत दे विजन उप्पर बी जोर भरेआ। डॉ. सिंह होरें भारतीय अंतरिक्ष अनुसंधान संगठन दे औने आहले मिशनें बारै बी दस्सेआ जेह्दे च गगनयान 2035 तगर भारत अंतरिक्ष भारत अंतरिक्षा नांS दा भारतीय स्टेशन शुरू करना ते 2040 तगर इक भारतीय अंतरिक्ष यात्री गी चंद्राम उप्पर उतारना शामिल ऐ।

<><><><><><>

Bharat-Atta

केंद्र सरकार नै जरूरी खाने-पीने आहली चीजें दी कीमतें गी स्थिर रखने दे कन्नोकन्नी करसानें गी सेई ते लोडचदा मुल्ल यकीनी करने आस्तै केई गैंS पुट्टियां ना। इस क्रम च उपभोक्ता, खुराक ते सार्वजनिक बंड सरबन्धी मंत्री प्रह्लाद जोशी होरें नमीं दिल्ली च भारत ब्रांड चौल ते आटा योजना दे दुए गेड़ दा उद्घाटन कीता। भारत ब्रांड आटा 30 रपे फही किलोग्राम ते भारत ब्रांड चौल 34 रपे फही किलोग्राम दे स्हाबै उपलब्ध ऐ। उद्घाटन मगरा जोशी होरें अपने संबोधन च आखेआ जे भारत ब्रांड चौल ते आटे दी विक्री थवां किफायती दरें पर आपूर्ति बंदोग ते बजार च उनें जरूरी खाद्य पदार्थें दी कीमतें गी काबू च कीता जाई सकोग। भारत ब्रांड दे उत्पाद केंद्री भंडार, भारतीय राष्ट्रीय कृषि सहकारी विपणन संघ ते भारतीय राष्ट्रीय सहकारी उपभोक्ता महासंघ थवां खरीदे जाई सकदे ना।

<><><><><><>

Prez.

राष्ट्रपति द्रौपदी मुर्मू होरें आखेआ जे भारत धम्म दी पवित्र भूमि ऐ ते हर युग च इत्ये केई सारे महान गुरु ते उच्च कोटी दे विद्वान होए ना। नमीं दिल्ली च पैहले एशियाई बौद्ध शिखर सम्मेलन गी संबोधित करदे होई राष्ट्रपति मुर्मू होरें आखेआ जे भगवान बुद्ध दा इनें पथ प्रदर्शकें च अद्वितीय थाहर ऐ। उनें इस गल्ला पर लोऽ पाई जे बोध गया च बोधि वृक्ष हेठ सिद्धार्थ गौतम गी ज्ञान हासिल होना इतिहास च इक अद्वितीय घटना ऐ। राष्ट्रपति होरें आखेआ जे अज्ज दुनिया केई सारे मोर्चे पर अस्तित्व दे संकट दा सामना करा रदी ऐ पर बौद्ध समुदाय कश मानव जाति गी देने आस्तै मता किश ऐ। उनें इस पर चर्चा करने दी जरूरता पर जोर पाया जे एशिया गी मजबूत करने च बौद्ध धर्म दी केहू भूमिका ऐ ते एहू कियां एशिया ते दुनिया च असल शांति आहनी सकदा ऐ। संस्कृति मंत्रालय, अंतरराष्ट्रीय बौद्ध परिसंघ दे सहयोग कन्नै बौद्ध धर्म गी सम्मानित करने आस्तै 2 दिन दे शिखर सम्मेलन दा आयोजन करा रदा ऐ। शिखर सम्मेलन दा विशे ऐ-एशिया गी मजबूत बनाने च बुद्ध धम्म दी भूमिका।

<><><><><><>

Vigilance-Week ACB

जम्मू-कश्मीर एंटी क्रप्शन ब्यूरो विजिलेंस अवेयरनेस वीक यानि सतर्कता जागरूकता सप्ताह मना करदा ऐ। एसीबी हर बरे सतर्कता जागरूकता सप्ताह मनांदी ऐ तां जे जीवन दे सब्बनें हितधारकें गी किट्टा कीता जाई सकै। इस बरे एहू 31 अक्तूबर थमां 6 नवंबर तगर मनाया जा'रदा ऐ ते इस बारी दा विशे हा .. यानि विकसित राष्ट्र आस्तै भ्रष्टाचार मुक्त भारत। इस सरबन्धै च पूरे जम्मू-कश्मीर च सतर्कता जागरूकता आस्तै बक्ख-बक्ख जागरूकता कार्यक्रमें दा

आयोजन कीता जा'रदा ऐ। एसीबी ते डिस्ट्रिक्ट एडमिनिस्ट्रेशन नै रियासी च इक सेमीनार दा आयोजन कीता जेह्दे च बक्ख-बक्ख मैहकमे दे अफसर ते अधिकारी बी शामिल होए। सहाडे जिला संवाददाता देवेन्द्र ठाकुर हुंदे कन्नै रियासी दे डिप्टी कमिशनर विशेष महाजन होरें गल्लबात करदे होई आखेआ।

<><><><><><>

Traffic-Violators

जम्मू-श्रीनगर राष्ट्रीय जरनैली शिड़क उप्पर जखैरी चेक नाका थाहर जम्मू-कश्मीर ट्रैफिक पुलस नै ट्रैफिक नियम त्रुडने आह्लें दे खलाफ इक खास अभियान चलाया। इस अभियान गी चलाने दा मकसद खासतौरा पर दोपहिया सवारियों दे हेलमेट नेई लाए जाने उप्पर हा। इनें लोकें गी 1000 शा मते चलान जारी कीते गए। राष्ट्रीय जरनैली शिड़क रामबन दे एसएसपी रोहित बसकोत्रा होरें आकाशवाणी कन्नै गल्लबात करदे होई आखेआ।

<><><><><><>

CM-Assembly

जम्मू-कश्मीर विधानसभा दे सत्र दे दुए दिन मुख्मन्त्री उमर अब्दुल्ला होरें दिवंगत नेताएं गी श्रद्धांजलि देने बारै बोलदे होई आखेआ जे एह इक रिवायत ऐ दिवंगत आत्माएं गी चेता करने दी ते उंदे योगदान बारै स्मर्ण करने दी। मुख्मन्त्री होरें आखेआ जे इयै नेहू अवसर इक मौका हुंदे न, उनें लोकें दे योगदान गी चेता करने दा जिनें समाज च अपनी छाप छोड़ी ऐ। अज्ज साबका प्रधानमंत्रिण, स्पीकर, विधान परिशद दे मिम्बरें, विधानसभा दे मिम्बरें गी श्रद्धांजलि दिती गेई। जिनें प्रमुख लोकें गी अज्ज चेता कीता गेआ, उंदे च साबका राष्ट्रपति प्रणव मुखर्जी होर बी शामिल हे। उनें मुखर्जी हुंदी निश्ठा ते बचनबद्धता कन्नै करने आह्ले उंदे धेय्ये गी चेता कीता। मुख्मन्त्री होरें साबका प्रधानमंत्री अटल बिहारी बाजपेयी होरें गी बी चेता कीता जिनें गी भारत रत्न कन्नै सम्मानित कीता गेदा ऐ। उमर होरें बाजपेयी हुंदे कन्नै कम्म करने दे अपने अनुभव गी सांझा कीता। भारत ते पाकिस्तान बश्कार बेहतर ते शांतिपूर्ण रिश्ते प्रति बाजपेयी हुंदे नजरिए गी बी सांझा कीता। उनें बाजपेयी हुंदे इंसानियत, जम्हूरियत ते कश्मीरियत आह्ले स्नेह गी बी दोहराया। बाजपेयी हुंदा मनना हा जे अस अपने दोस्त बदली सकने आं पर गोआंडी नेई। मुख्मन्त्री होरें देवेन्द्र सिंह राणा हुंदे कन्नै अपनी यादें गी बी सांझा कीता। उनें आखेआ जे उनेंगी राणा हुंदी बमारी बारै नेई पता हा ते नां गै एह जे ओहू इन्नी तौलें सब्बनें गी छोड़िए चली जाडन। जेकर ओहू जानदे जे इयां होग तां ओहू उंदे कन्नै अपने रिश्ते गी मजबूत बनांदे ते होर बेहतर करदे।

<><><><><><>

Omar-Vajpayee

मुख्मन्त्री उमर अब्दुल्ला होरें अज्ज आखेआ ऐ जे केंद्र च सत्ताधारी पार्टी बीजेपी साबका प्रधानमंत्री अटल बिहारी बाजपेयी हुंदे नजरिये गी अपनाई लेंदा ते जम्मू-कश्मीर दी मौजूदा स्थिति इयो जनेई नेई होंदी। जम्मू-कश्मीर विधानसभा Obituary reference दरान बोलदे होई अब्दुल्ला होरें साबका प्रधानमंत्री हुंदी सिफत करदे होई आखेआ जे बाजपेयी होरें म्हेशां जम्मू-कश्मीर दी स्थिति गी बेहतर बाने दी कोशश कीती ऐ। मुख्मन्त्री होरें आखेआ

जे 1999 च जिसलै बाजपेयी होर पैहली बारी दिल्ली लाहोर बस च पाकिस्तान गे हे तां उनें मीनार-ए-पाकिस्तान दा दौरा बी लाया हा जेहडा करना कोई सौकखा नेई हा ते बन्ने कच्छ खडोइयै आखेआ हा जे अस दोस्त बदली सकने आं पर पडोसी नेई। उनें आखेआ हा जे गल्लबात ही सिं इक रस्ता ऐ। मुखमन्त्री होरें आखेआ जे बाजपेयी होरें म्हेशां तनाव गी घट्ट करने दी कोशश कीती ही। उनें आखेआ जे अज्ज असेंगी बक्ख-बक्ख रखने दी कोशश कीती जा करदी ऐ।

<><><><><><>

Spekar-Pannel

जम्मू-कश्मीर विधानसभा सत्र दे दुए दिन अध्यक्ष आसेआ चेयरमैद दे पैनल बारै घोशणा कीती गई। विधानसभा दे स्पीकर अब्दुल रहीम राथ होरें नेशनल कांफ्रेंस दे नेता मुबारक गुल, सीपीआईएम दे मोहम्मद युसुफ तारीगामी ते बीजेपी दे सुरजीत सिंह सलाथिया होरें गी पैनल आस्तै नामजद कीता। स्पीकर होरें साबका राष्ट्रपति प्रणव मुखर्जी, साबका प्रधानमंत्री अटल बिहारी बाजपेई, साबका लोकसभा स्पीकर सोमनाथ चटर्जी होरें गी श्रद्धांजलि भेंट कीती। सत्र दौरान केई सारें दिवंगत नेताएं गी श्रद्धांजलि दिती गई। सत्र दौरान चमन लाल गुप्ता, अब्दुल राशिद डार, मदन लाल शर्मा, मोहम्मद शरीफ नियाज, सईद मुश्ताक अहमद बुखारी, ठाकुर रणधीर सिंह ते गोविंद राम शर्मा होरें गी श्रद्धांजलि भेंट कीती। एहदे अलावा देवेन्द्र सिंह राणा, के.डी सेठी, हाजी अब्दुल अजीज परें, मोहम्मद यासीन शाह, मोहम्मद शरीफ खान ते अब्दुल गनी नसीम शामिल ना।

<><><><><><>

LG-Statehood

उप-राज्यपाल मनोज सिन्हा होरें अज्ज आखेआ ऐ जे जम्मू-कश्मीर गी राज्य दा दर्जा मिलना उन्ना गै पक्का ऐ जिन्नी पूर्व थमां सूरजा दा चढना। उनपें एह बी आखेआ जे इस प्रतिबद्धता गी पूरा करने लेई कुसै बी राजनीतिक प्रयास जां वादें दी लोड नेई ऐ। एल.जी होरें एह गल्ल उत्तरी कश्मीर दे बारामूला जिले दे इक कार्यक्रम च सभा गी संबोधित करदे होई आखी।

<><><><><><>

Sakina-Pvt. School's

शिक्षा मंत्री सकीना इत्तू होरें अज्ज आखेआ जे सरकार उनें निजी स्कूलें दी जांच करोग ते उंदे खलाफ कार्रवाई करग जेहडे नियम कायदें दा पालन नेई करा'रदे ना। पत्रकारें कन्नै गल्लबात करदे होई मंत्री होरें आखेआ जे सरकार नै पैहले गै ट्यूशन फीस ते होरतें शुल्क लैने सरबंधी नियम-कायदें दी जानकारी सारें गी दिती ऐ। उनें आखेआ जे जम्मू-कश्मीर दे निजी स्कूलें गी सरकार आसेआ नियंत्रित कीता जा'रदा ऐ ते नियम कायदें दा पालन नेई करदे होई फीस बदाने आहलें उप्पर कार्रवाई कीती जाग। उनें आखेआ जे इस मामले च कोई बी निजी स्कूल सरकार आसेआ तैयार कीते गेदे नियमें दे खलाफ कम्म करग तां सरबंधत अधिकारी उनें संस्थाएं दी जांच करियै उंदे खलाफ कार्रवाई करडन।

<><><><><><>